

榆次縣志卷十八

卓行錄

榆次風尚質直讀書之士知勉氣節敦行誼流風所被鄉曲編氓亦能篤志不欺且爲士夫所不違嗚呼盛矣今更勵學之政日見推行學校之興不遺餘壤向所稱行著於鄉者或且不適今時然論世知人儒家所尚卽策時明達抑且云固有道德應當恢復然則凡篤倫紀具幹略謹操修者彙而存之雖不能如舊志之甄錄纂嚴然善善從長事實具在或亦爲後賢取鏡之資乎

漢

榆次縣志

卷十八卓行錄漢唐

一

郝子廉太原人飢不得食寒不得衣一介不取諸人曾過姊飯留十五錢默置席下去每行飲水常投一錢井中錄舊志

唐

石義奮世幽州人父昭立爲儒生天寶末安祿山反昭立惡居叛亂地挈家走京師爲賊將所追家人被殺惟昭立與義奮得亡脫奔太原昭立往來教授數年買田結茅於洞渦之側遂爲榆次人義奮善書疏能挽強擊劍常遊河北朱滔客之時滔將悖逆以義奮有才謀欲引居腹心義奮知滔不臣常正色謂滔曰自古無亂臣賊子能全身家者公自視與安史如何安史負恩背德甘蹈兇逆未幾誅夷天下醜恨公必毋循其轍終身爲唐



臣不獨富貴延子孫且免後世唾矣滔怒囚之未及殺守者哀其義陰使逃去變姓名爲王武俊小吏久之武俊覺焉武俊故陽結滔陰持兩端呼義奮試問今日事義奮爲陳古忠臣與奸逆究竟勸速絕滔表其罪武俊雖不能用然意已爲所感動及李抱真結武俊使奉天子武俊卒聽約義奮後自岐山尉歷官比部郎中錄舊志

馮秀誠王士昊皆榆次人事母孝兩人母病亟秀誠士昊並割股和藥以飲之疾漸愈時令狐楚爲河東節度使太原尹表其事於朝稱秀誠士昊或生在草茅或長於市井忘甚痛於已軀期有瘳於親疾可以感神明變風俗宜與旌揚以崇善類詔表兩

榆次縣志

卷十八卓行錄元明

二

人門錄舊志

元

鄭甫與弟勝並以齒德爲鄉里所敬至正二年有詔旌高年者碩之士有司以名聞詔縣長吏表署如式大書其門以旌之據舊志許諒高年有行誼里人薰化其德至正癸巳詔旌其閭錄舊志謝默篤志好學博通經籍事母以孝聞高尚其志終身勿仕錄舊志

明

趙梅東陽鎮人原籍江蘇無錫縣與弟楷季失其名三人同居性均友愛躬耕爲業家僅中貲先是元末晉冀迭遭兵燹赤地無餘明洪武初廷議遷南民以實晉疆楷例應徙梅不忍仲之遠



去百計營謀卒不獲楷遂適晉居於鎮梅自仲行後刻不去心  
欲卽從往又以季弟年少不忍棄每一言及動輒涕零後數年  
乃盡以田產授之季弟囑其勤儉守業自率妻子赴晉旣至兄  
弟竝力耕田家用饒裕梅二子楷五子均謹遵親訓農商並務  
卒成素封然伯仲均念季弗衰每欲返籍因事未果尋相繼卒  
臨終誠諸子曰吾兄弟生則同宅歿則同塋違命卽爲不孝所  
憾者季弟在南不獲一面耳卒後諸子文經等遵遺命並葬一  
塋無何季在籍苦思二兄亦來鎮比至則二兄已歿卽詣墳哭  
奠哀慟幾絕諸姪扶掖歸家因以不起臨終謂諸猶子曰吾兄  
弟生未晤面死當葬於二昆冢旁魂如有知或可相逢於泉壤

榆次縣志

卷十八 卓行錄明

三

倘吾子來迎樞切不可令昇歸故鄉也諸姪遵命葬於伯仲冢  
旁至今鎮之東南趙氏先塋正面二冢竝峙偏西又有一家排  
列云

宋鑑正統中縣饑鑑出穀二千一十石助有司賑卹長吏以聞朝  
廷降勅褒之于敏正統中輸財助官賑濟旌爲義民鄭肅北趙  
村人景泰六年歲凶肅以雜粟六百餘石調卹貧民有司以狀  
聞朝廷勅旌其門曰冠帶義民鄭肅之門至今有坊在據舊志

趙復性邑諸生父玉卒復性號泣不食數殞絕及葬廬於墓側草  
棲露宿者三年過客爲之酸感族人毀其廬強載以歸知縣崔  
岑狀於朝旌其孝行錄舊志



周文德御史鈇之父也生而靜重不妄言笑父歿事母及祖母曲致孝養弟早亡撫遺孤如已己子既長為置產授室姪感化而父事焉為人排難解紛暮夜風雨無所避有以死罪誣人者文德為力白於官得釋邑令聞其賢請為賓飲於鄉文德年既高人知其素行皆望而敬之卒祀鄉賢錄舊志

寇恭字敬之在城一里人少為諸生與弟儉並有名邑中稱曰二寇恭天資甚敏於書一見輒能誦而孝友仁厚有古君子長者風或竊其物者已捕得之則蹙然曰此特迫於饑寒耳竟釋使去常約鄉人以朔望行禮於社而相勸為善其後鄉人效之遂以成俗生平不喜華飾雖晚以子天叙貴累封副都御史而沖

榆次縣志

卷十八 卓行錄明

四

約自如早工文聲振場屋然久之始以貢為定州判官判官職卑冗恭為之有惠於民及歸未嘗以家人生業為務儉字約之年二十始折節讀書遂登進士授大理評事未五十而歿士論爭惜焉儉子天與恭加撫愛而教使成立亦舉進士由戶部郎出知東昌府時稱其有理劇才寇氏自儉天與及恭子天叙叙天叙子陽前後登進士為邑中門第之尤盛者恭儉俱祀鄉賢錄舊志金中夫天性純孝弱冠時父鼎得危疾中夫割股和湯以進疾遂瘳中夫善書能文中正德丁卯舉人仕由工部郎出知鞏昌府有惠政祀鄉賢據舊志

閻大綸以貢生為安吉州訓導調容城教諭善誨諸生禮法不苟



謂道德文章不容偏重士風一變其空疏虛僑習少時父疇疾  
亟大綸禱於神乞減已壽以益父算父疾旋愈兄大經性剛嚴  
大綸委曲承之怡怡如也邑人稱孝友者必曰育菴先生育菴  
大綸自號也嘗論觀過知仁人誰無過若非無舉刺無刺同流  
合污衆悅自是孟子斥不可入堯舜之道惡鄉愿學者宜戒之

嘉靖壬寅卒年六十九歲略據舊志

劉陽白田村人嘉靖二十年陽生未晬時值虜患母棄陽山中而  
逃陽祖母王亦抱二歲女以逃聞陽啼聲乃棄女攜陽歸王寡  
居四十年陽事王朝夕定省不稍懈及卒喪葬盡禮終其身思  
慕不忘萬曆中邑令表其門據舊志

榆次縣志

卷十八卓行錄明

五

張國儒字翼真孟家井里人萬曆戊戌進士官行人轉刑科給事  
陞都諫掌兵科戒子弟曰貪弁債帥多營求若受其私禮非吾  
志也汝輩切勿然外轉遼東參政凡七上疏辭不赴著有三垣  
疏草皆森嚴剴切人不敢言者卒於家郡縣俱祀鄉賢錄舊志

張九河字宗禹別號儼弦王胡里人少端重如成人長爲縣生員  
益勵廉隅人稱張夫子邑令知其賢延爲子師以九河貧屢諷  
關說他事九河毅然不屑萬曆戊子舉於鄉非公事不至縣庭  
邑令史記事嘗曰吾於張孝廉求一揖之不可得也况其他乎  
知河南汜水縣縣人德之上官捕盜欲株連平民九河力請得  
免遂相忤降爲順天府照磨補大冶令不能與人委曲乃拂衣



歸九河內行純篤教其子甚嚴子養中鄉舉爲新衣服之九河見而怒責使長跪竟日親戚爲謝過乃已據舊志

畢良東陽鎮人家素饒裕性尤慈祥以鎮堡東南距金水僅數里雖有王都車輜等村連纏爲渠然興廢不常通塞無定每當春水漲發由高注下勢如建瓴堡外田禾輒被衝沒明萬曆間水暴漲衝齧堡垣傾毀三十餘丈禾苗盡淹廬舍半圯人民震駭知縣劉公似鼇聞之躬臨勘驗詳察情形謂非開渠不足以永絕後患鎮民以甫遭水災籌款爲艱良慨然獨任願破產浚渠以杜災害卽自捐數百金公推鎮人張文華趙希尹等分別任渠長水甲迅速開挖數月工竣渠分爲三劉公臨視大爲嘉獎

榆次縣志

卷十八 卓行錄明清 六

特任良爲渠長是渠灌田三十餘頃爲本鎮利彭村德音等村亦得分沾餘潤焉

王屏朱東聶村人邑中文學諸生也甲申三月李自成破京師明社已屋屏朱取衣巾焚之絕意仕進或有勸之者輒張目不答盤桓山谷間以終錄舊志

清

范紹淹字百人世居西河堡清順治初年廩生膽略過人時清雖定鼎而亂氛未靖有流寇號獅子頭者據於太原柳子峪中屢至郝村西河堡一帶騷擾紹淹畜一驢行極速一日騎以赴省請巡撫調兵痛剿之境遂安族人追念其功傳其容像歲時輪



流祭祀至今稱頌弗衰

張運通明御史養子也養在明季以事下獄運通入犴狴左右奉侍又叩闕請以身代繫不許養禁獄中七年甲申春李自成破京師始得出運通侍養歸榆次已而賊敗西奔擄養等往關中運通隨養行頻涉危苦至商州猝遇虎虎不爲害後養得放還旣歿運通喪葬無違禮其事母尤篤焉初運通聘耿宗舜女未娶宗舜官江西值金聲桓之亂隔絕者數年女已長宗舜欲爲改字女堅不可卒待運通而婚焉後運通置妾郝氏年十八甫二載而運通病篤召郝曰汝方艾未有生育吾死惟所適郝流涕不答運通卒於康熙己酉年年三十六歲運通旣卒郝屏居

榆次縣志

卷十八卓行錄清

七

幽室紡績自養者五十年人稱節孝萃於一門云據舊志

霍夢蘭順德府同知俊士子也明崇禎甲申正月李自成自秦入晉太原諸縣皆下賊署蕭恆爲僞令執諸縉紳令出家財助軍不則加重拷俊士當出五千金無以償夢蘭代父出應僞吏身受掠擄無完膚事方急而李自成東破京師以五月敗歸夢蘭聞之因潛奉父母出城亡匿山中已而賊至榆次蕭蕭恆迎於郭外城中人遂閉門守賊怒甚攻城城陷賊屠殺數千人復遣兵四出搜逃亡者俊士與夢蘭俱被執獲賊遂以左應選張養及俊士等併其妻子繫往關中夢蘭在賊間辛苦奉父母行瀕危者屢矣賊僞吏周國明者保護之因以得免旣至西安賊安置



俊士等於商州商州久經殘破無人居夢蘭隨俊士行山谷間其艱楚險毒倍甚於被俘入陝時然夢蘭左右扶持俊士卒無恙及三秦既平乃與父並得釋歸當俊士之繫而西也其妻死賊中乃藁葬焉夢蘭既奉父歸復往陝招母魂以其喪還俊士卒合窆於墓蘭遭禍家破貧甚又早經酸苦以羸疾終嘗作天變錄備述其事讀者多傷感據舊志

韓煒魏岳村人以舉人任山陽令二年告歸風素自如任卹鄉里多感其惠公舉鄉飲大賓年七十餘卒初煒爲諸生時邑令劉星雅重之待有加禮及星去煒絕足不至縣門錄舊志

王介石字豫二南關人性高邁寡嗜好生平未嘗與人爭少喜讀

榆次縣志

卷十八卓行錄清

八

書比壯益究經史旁及釋老之學皆有所論說太原徵君傅山高世士也見介石而悅之賦詩以贈而定交焉介石任平遙榮河司訓以古文教諸生有郭生者常忤令令以短於學使者會使者至郭甚恐因密懷金夜至介石所欲求爲援介石默不應郭私念己必危心恨介石已而使者無斥郭生意郭始知其陰全已然而介石終不自言後數年司諭廣昌廣昌邊地士習喬野介石寬以誘之使其長子執爨與諸生共相講論士多嚮學久之遷河南桐柏令疾作不之官卒於家錄舊志

周昌運明御史鉄之後也早孤育於祖母及長事祖母甚篤以家貧乃習商他日與其儕貿易京師忽心動曰祖母得毋有疾乎



遽行而歸果病且篤昌運與妻王氏共禱天神願以身代明日疾遂愈又二年其祖母復病卧床第者至十餘載昌運與妻侍之惟謹及卒廬於墓三年乾隆初有司以狀聞並建坊旌孝錄舊志

杜成嘗行道間拾遺金百兩訪其主歸焉則武弁武文煌父也知縣金世楨旌之郭全性愷厚少時娶妻張因多言出自是便不復娶人曰子年方壯宜娶也曰吾已有子矣勤業力田及田事畢秋冬之間草木黃落往刈柴薪積之日以為常人曰何勞苦若是曰吾不敢自惰至風雪大寒則召貧家無火者悉散與之又為人賃傭取值當歲荒全出數年傭值為粥於路以食丐者鄉里有爭者必邀父老共排解之康熙中以老壽終卒一成餅

榆次縣志

卷十八卓行錄清

師也本靜樂人僑於榆遂著籍焉一成為餅美人成稱辛氏餅一日客有自遠歸而過市者入肆擇餅擇已酬直去一成復作餅見地上有襍而小封甚固手之約十數金一成曰此買餅客之所遺也輟業追之行四五里許以襍還客不問其姓名而歸

錄舊志

周道興御史銖姪孫為諸生有古豪傑風時值流寇縱橫建白當事多方守禦邑人倚為長城生平篤行誼訓子瑋成進士由清苑令入為刑部郎擢知順德府其治行嘗列高第卒祀鄉賢錄舊志郝銑由武生援例考授衛千總為人慷慨好義邑人閭士魁得莊浪令貧不能赴任銑毅然資以千金及罷歸貧無以償亦竟不



索也有李生者因貧病銑延之於家而給以衣食及卒爲厚葬之宗黨親戚之婚喪不舉及貧乏者賑而恤之尤竭力云據舊志寇鳳鳴家貧父靖好飲食又不能獨食每與鄰里釀錢共飲或互爲賓主鳳鳴常力作每夕必以百錢置枕下終靖之世無間也知縣劉星表其門張星煜儒家子謹於事父母母侯病劇星煜截一指以血書佛經祈母速愈然侯竟死星煜痛幾絕頭鬚爲白事聞令建坊以旌寇居仁邑諸生安肅令光裕子也性篤摯少而失恃事繼母田能盡誠敬田歿居喪如禮邑令劉星行鄉飲禮舉爲賓王瑩少有至性事父母能曲體其心訓弟變成鄉舉孝友之名溢於里閭邑令劉星旌其門柳應發鄉人也家貧

榆次縣志

卷十八卓行錄清

十

親老傭力負販以供甘旨遇親病呼天請代湯藥必嘗邑令王亦宣給匾獎之錄舊志

張賦奇政奇兄弟俱好善遇貧者勿論親疏遠近皆多方周恤人或有急難則義形於色有相競者必勸止之當二人在時其里中遂無訟者又數出資財修橋補路人多感其德焉趙(文光)家饒於財而性特慷慨康熙六十年秋雨雹歲饑光文出穀以賑又爲鄉人立學舍延師使遠近皆來就學有張某者負人金不能償光文爲代還之雍正中知縣鄒雙旌其門錄舊志

段繡鳳幼失父及長言及父則哭不已性公方以公論舉鄉賓勤於公事一十八年雍正中闔邑特薦爲農官壽至八十有五王



璽西長壽村人性樸摯少孤奉孀母無違志兄性最嚴事之惟謹母歿後析爨不擇所取食貧無怨言子夢熊爲諸生家雖貧而生事喪葬俱竭力以孝著後贈文林郎王家賓阮西村人附貢生少失怙依繼母及長母病侍醫藥三月不解衣母終二載不飲酒茹葷人皆稱之

錄舊志

梁惠儀南溝村農人與弟恕儀相友愛正室旁構一小舍每食兄弟必俱弟病親煮湯藥晝夜不離嘗以祖塋狹隘議立新塋惠儀曰吾兄弟一生相依死安忍離及惠儀卒恕儀營葬並已壙亦成之而遷父葬焉尤篤於友誼太原某者惠儀舊交也後以道遠疏往來病甚謂其妻曰若衣食或不給榆次南溝村某吾

榆次縣志

卷十八 卓行錄清

十一

友也往尋之必有濟妻後携子來榆惠儀詢知其故凄然曰不料吾友已歿汝母子乃至此乎厚遣之歸後不時餽送卒使子成立又有戚某以婢贈惠儀時偕弟出耕及暮歸見之曰吾農家安得有婢僕乃認爲義女擇婿嫁之其好義類如此子名繼鱣爲邑諸生

錄舊志

王呂識字再來南關人幼患痘目偏盲叔世甫徵君系獨深賞之曰此醜兒有奇氣也遂取呂虔識王祥意以爲名讀書聰穎倍常兒喜博覽爲古文詩詞千言立就五經歲讀必周尤邃於易清雍正己酉中副貢時家居苦貧父又歿二弟錫書錫蕃方數歲遂携二弟手請於母曰今欲農無田欲賈無資而在世俗場



中免凍餓不可得也若忍凍餓向詩書求生活母許之乎母曰可遂去城之鄉自以小車輦母及二弟旁懸紡車一釜一囊一布裙一遇友人或正之笑而不答遂北之沙溝村開蒙館授讀自給且課兩弟不中程輒楚之日者弟以逃學匿空墟覓竟日不得泣白母母亦泣傍晚樵者挈弟俱歸弟牽母衣泣求兄怒母凄然曰姑稍緩不念熒熒者無父耶呂識跪而大感曰兒正因無父也兒教之代父教之也與其不讀書而凍餓死寧不讀書而筆楚死况筆楚不至死終于凍餓必至死不楚不讀不讀終不免凍餓母所知也母亦泣而諾曰然哉遂痛責兩弟兩弟由是學益力冬月有社友至門值大風雪聞讀書聲不稍間呼

之則請友自入見所居無敗絮猶攤書於几與二弟共讀微火溫粥俟熟將供母友惻然曰君甚憊矣呂識曰余方以天地爲室廬室廬爲衣裳也夫何憊乾隆戊午兩弟學能自立均爲諸生有文譽督課猶不稍寬秋試寓省督兩弟按課作文一日錫書文成同寓咸稱善閱畢乃擊以掌衆勸之且曰文豈不高耶曰應試文但投時足矣有此心何不用於讀書作人耶余正爲其高而擊之不願其徒作高文也比再作閱之喜曰可售矣秋錫書果捷明年成進士錫蕃於甲子舉於鄉家亦漸裕錫書部選四川知縣賀客畢至母出謂兩弟曰是皆汝伯兄之教也呂識長跪垂涕曰兒何功兒痛責二弟時不知者將謂兒手足之



忍豈知兒心之痛耶且兒非不知兄弟怡怡者也今幸兩弟能自立成功名兒何功哉賀客均賢之呂識旣以文行名生徒均樂就之多爲名諸生及領鄉薦者顧不自矜年逾六十猶橐筆應試興不少減或勸之則曰不第命也不應舉非命也幸天假吾精力不衰吾順天以安命何害以清乾隆辛巳卒年六十三

歲

略據舊志

鄭宗舜以耆老舉爲農官乾隆十二年捐義倉穀六十石縣令給匾以旌邢開運性慈良多善行於困貧尤喜周卹歲施棺木以予貧不能殮者凡橋梁道路開運以其貲力修葺之雖重費不惜也人知其好善困苦殘疾多往投之開運必有所濟年至八

榆次縣志

卷十八卓行錄清 十三

十餘李鍾瑞東長壽人家資饒裕凡買田物不與人爭價曰吾念其貧不忍減也乾隆四十九年歲饑捐銀伍百兩買米賑濟至嘉慶十年又饑後捐五百金散賑里人贈以匾額曰周急可風其子適與孫豫順於道光年亦捐錢數百千以賑饑焉于建業國學生龍田里人乾隆五十二年歲大歉建業爲粥與餓者自冬至春全活甚衆錄舊志

史必信史家莊人慷慨好義嘗捐千金擇地生息爲潤族資凡族中窮苦老幼每月各給錢文冬季與以衣死喪給以棺皆有常數由衛守備馳贈朝議大夫胡光地宇樹人懷仁里人父歿後與諸姪同居持家有法不事姑息族中有不舉火者歲周以粟



不責償也婚葬之事助以常數有窮老節婦三人爲之作傳且伺其困乏而調卹之乾隆壬寅別開河渠里人至今利之嘗抵京師過深澤見至聖廟像露處招其里人捐百金勸修葺之廟貌一新晚年營樓崖別業隱居自樂不喜浮囂年近九十乃卒

錄舊志

劉應治慶城村人以武生中式清乾隆戊午科武舉秉性誠懇尤好義急公先是西疆用兵邑當孔道支應浩繁官吏強立名目借端科派日益增加民不堪命應治目擊心傷稟請核減知縣以攻訐其短當卽駁斥適高宗巡幸五台假迎駕爲名攔輦具控帝覽之卽召見於行在詢悉弊害諭令地方官加意撙節並

榆次縣志

卷十八卓行錄清

十四

立公和局派鄉紳公同管理以免冒濫帝諭侍臣命賞以官應治力辭乃賞黃馬褂一襲受賜歸里懸於堂中及後四鄉公舉局紳競推應治爲首堅辭不應至老病革戒其子曰差徭一事僥倖成功嗣宜聽四鄉經理不可妄思染指倘有謀充局紳者非吾子孫也死後不得葬於先塋卒後鄉人爲之鳩貲建祠懸所賜黃馬褂於饗堂以爲紀念云孫國彥成邑庠生

左輔尉在城人歲貢生謙謹能讓敬兄尤無敢違人有以家貧債迫欲賣婦以償者尉分修金爲平其債乃得全又嘗有二人以悞考將除衣項尉爲出資曲成之晚工書畫不務浮華殊有雅

人深致錄舊志



孫縉什貼人道光辛巳舉孝廉生有至性父疾甫三越宿遽即世縉呼號幾絕其母責以毀不危身大義乃稍節哀葬祭悉依家禮至禫之日比御不入焉族人有緩急輒推解不少吝嘉慶癸酉丁丑歲屢歉市米昂貴斗值千錢有奇縉拚已粟差半減價以救荒已粟不給轉糴於市以繼之賸值斗數百錢縉不爲介意其好義類如此錄舊志

斐致筠東陽鎮人秉性端方存心質直見人有過不肯含容自身有失亦直言不諱成武生於清嘉庚午科中武舉會試未遇歸里後尤慎以持躬切於化俗見鄉人之帽有不正者輒擊之墜地鞋有斜拖者即奪而毀之察其家貧則別買帽鞋以償之復

榆次縣志

卷十八卓行錄清

十五

諄諄訓誨冀其後悔其教訓族人子弟尤以不墜先型不染浮俗爲最要今雖逝世已久而遐邇推舉直道者尚以致筠爲首焉

秦必忠東陽鎮人自幼經商膽識異常當清嘉慶後茶行初興北人赴南省辦茶舟楫風波恆視爲畏途必忠坦然無疑屢年往返均獲厚利末次南下值水災淹沒十餘縣不得下船者至七十餘日斯時航路未通乃繞道廣東省而歸見者無不以重生爲賀必忠終未述其歷險之苦旋以母命辭肆事歸籍奉母惟恐親不歡訓子常慮事乖義與村人言言勤儉與商人言言公平與學生言言忠信其言藹如人皆願聞老乃經理金水河渠



事十餘年無一事不以和平解決需費從不濫派當時鎮長極有聲勢每欲援以為己助因不滿其人善言辭避不觸其怒時許為善全友道焉

趙灝字靜塘東陽鎮人父德茂早卒孀母韓氏紡織縫紉養贍遺孤與弟淑皆能成立幼年孺慕性成母有微疾則左右奉侍寢食不遑或有問及其父者則悲哀涕泣不能答遇弟甚友愛命子孟康事叔如己子亦謹遵嚴命終身孝養無間灝年十七歲經商於蘇州一日偶思孀母即謝絕商侶而歸自是不外出然營業勤慎家產日漸贏清道光咸豐間屢逢災祲輒提倡捐粟以賑饑民並勸募富戶施米濟荒鎮人賴以生全者無算又廣

榆次縣志

卷十八卓行錄清

十六

購衣冠器具以備村人婚喪借用有失落損壞者從不計較忠厚寬容至老彌篤年七十五歲無病而終

王萬全西付村人因本村地當孔道不時過往人犯押解差役向各村莊每名索車一輛村中每年費錢數十千文既非定例為害實深萬全乃奮不顧身曉然鳴官凡府縣堂訊受數年之艱辛竭一村之資斧事卒得直永免送犯人車輛事在清道光初村人為勒碑以頌云

劉觀錫字寵之在城一都人為邑諸生肫謹無違禮父歿會母病因泣禱父墓次日即瘳嘗收租佃戶憐其貧貸之復給以錢偶行道中得遺袂舉之頗重知為白銀也坐而待少頃失者至即



畀之叩姓名不告其婦家號素封予以數千金不受道光辛巳  
公舉孝廉方正人皆以為無愧云任學信下湍里人二十四歲  
失偶所遺一子賴兄嫂撫育家頗小康不再娶勤儉和厚七十  
九歲卒初黨以義稱之子媳俱孝孫三人曾孫四人錄舊志

楊騰鳳龍田里人偶適使趙村見古墳內有人將自經急解之問  
故其人曰予因歎債無可償故至此鳳如數代償之人皆以為  
善後其子大德以武庠生候銓都司友愛二弟大功大儒俱登  
武科孫遊庠者六七人王萬慶什貼南窰頭人開店宿舍客一日  
有長白宣維藩投宿臨行匆猝遺數十金而去店中傭保得之  
以白於慶慶曰此必宿舍所遺勿私也乃靜候終日俟其主來

榆次縣志

卷十八卓行錄清

十七

覓還之藩甚喜欲以金酬之慶辭不受此道光十二年事也

錄舊志

周順天張慶里人好義輕財有常姓者誼甚疎一日質衣物於典  
肆若欲泣者順天驚曰汝何故若是常曰有債相逼非止質衣  
且將鬻妻子耳順天即如數代償之其家室乃得全常秉直車  
輞里人年近八旬其子德元欲以音樽為父祝嘏秉直曰值此  
饑年糧價騰貴與其燕客一日曷若濟貧三冬於是捐米六十  
石所活甚眾里人匾其門曰德被桑梓史璠史家莊人候銓道  
性體凝重厚以與人道光年歲饑出粟五十餘石以拯窮乏人  
藉以遂生者無算王俊彥東聶村人捐職從九品敏於任事尤  
篤宗誼家不中貲值歲饑族中啼飢者數十家愀然曰吾力棉



薄不能遍調鄉黨忍令族人有餓死者乎乃糴粟以濟之計口衆寡按日給散貧者賴以全活焉後封文林郎

錄舊志

王全坦車輞村人仁厚待人尤卹貧苦值冬大雪買羊皮衣一百二十件羊皮袴二十條以贈無衣者侯秉文德音村人邑庠生與胞兄秉忠相友好施與清咸豐三年金河漲發里人壞廬舍者甚衆秉文請於兄開道南兩大宅處被災者且出粟數十石以賑焉

錄舊志

杜萬年東陽鎮人家本素封性樂施舍鄉鄰之受其惠者無不感頌道光六年久旱不雨秋禾歉收貧困農民大多飢迫萬年憫惻殊甚捐米十石以賑濟之於是鎮人聞風興起競出粟以施

榆次縣志

卷十八卓行錄清 十八

濟是歲雖逢大浸而閭閻得慶安堵者實資提倡之力也至八十餘始卒子鍾靈鍾秀均入邑庠其急公好義殊有父風云

趙邦儀楊村人少嗜讀書淹通經史不屑以時文自見老而數奇屢試鄉闈輒落至道光己酉科年逾強仕始登鄉舉一赴會試卽誓不復試設館鄉里以教授自給時咸豐初粵亂已漸及北省一日方午餐有客排闥入見自稱身本粵儒因亂羈晉欲歸不得聞先生慷慨好義特來請謁妄冀推解以濟窮途邦儀察其英偉不類江湖遊客因加禮貌延與共食抵掌而談各抒胸臆一飯之頃遂成莫逆晚卽留宿館中越數日客晨起辭行出修資三十金贈之其人不辭亦不言謝乃密語曰予久欲有言



因未悉先生之心不便啓齒今既爲知己敢進忠告滿人朝政  
紊亂勢必覆亡天國英傑輩出終當成功先生如有意弟返江  
蘇當爲推轂邦儀曰拙朽已叨本朝鄉舉何敢更萌異志况年  
已將衰縱勉強應命亦何所裨吾志決必以教授終老耳客聞  
言歎曰吾過矣以先生之品詣豈有改事新朝者此刻分袂來  
歲必仍與先生晤會也言已鄭重而別逾年無耗已度外置之  
會同鄉商人在南避亂爲粵軍所獲執見東王詢知榆次人立  
令釋縛賜以酒食各贈數金又以金二百付之囑曰前年曾遊  
貴縣承趙君邦儀留款贈金約次年復會不料事與願違竟至  
爽約爾輩旋里卽以此金餽之並語以彼此有緣不久必當復

榆次縣志

卷十八卓行錄清 十九

晤也飭令巡兵護送出境商人旋里赴館拜謁並呈餽金邦儀  
堅辭弗受卽以分給衆商均拜謝而去其子庠生之藩曾述諸  
人云

李智春字若愚鞏村人生貧家取予不苟幼父母卒兄傭工仲兄  
且殤於是學商於直隸順德府布店數十年勤勞無間爲執事  
者所重積有餘資乃旋里娶婦王氏方及笄能相與作苦智春  
每赴肆恆步行嘗行至南和拾遺金於路故緩行以待索者有  
騎者追至甚惶遽詢所遺相符乃與之而不索謝以故名頗傳  
於順德市廛間清道光初白蓮教亂作肆友皆趨避以智春頗  
習拳屬守肆至資用不給乃歸里作小營業年四十歲卒王氏



堅苦持家撫三子皆成立長商於直隸赤城次三二子耕作後家漸起時王氏家有母迎養之以天年終乃歸葬氏至老勤儉不易其度年七十三歲卒邑王副貢用中爲作義夫貞婦傳焉常維城字子固車輞村人清生員父年老經商多倫宣化間恆數載不歸維城不忍久違定省因負笈從游依依膝下克盡子職父歿哀毀幾不欲生扶櫬負遺像走千餘里歸葬祖塋侍繼母孝處異母弟能諸事曲從友愛備至家庭骨肉有非常人所能堪者晚年遵母命與弟析居凡良田美產任弟自擇惟母命是從平居布衣蔬食黎明卽起家雖素封自奉一如寒素遇人有急需解衣推食無稍吝色清道光中邑書院爲諸生籌膏火樂

榆次縣志

卷十八卓行錄清

二十

捐千金以爲之倡知縣文光贈以崇文尚義匾額村人有爭執事得維城一言立解或有不能婚娶及喪未能葬者輒助以財且代爲經營一切故村人恆德之清咸豐辛酉卒年七十一歲鄰里鄉黨不期而集者數百人哭聲震閭巷雖乞丐無力購香資者其葬也亦爭執鑿櫬之役以圖報稱迄今數十年鄉人談孝弟仁德者猶豔稱之

許元英庠生張慶村人性至孝生平用力用勞克盡子職親歿之日一痛幾絕及卒戚族勒石紀行碑碣歸然皆實蹟也劉炳東陽鎮人性孝友事親終身無間言母卒廬墓三年事死如生聞者感惻楊玉福東陽鎮人家貧竭力奉母母卧疾十八年侍藥



餌維謹每禱於神求以身代母得以天年終趙德瑞東陽人事親以禮兄早逝遺孤幼飲食教誨無異己子四十餘年如一日趙德全東陽人重骨肉卹孤寡族姓有寒苦者給以房屋使有所庇遇瘟疫流行代為延醫調治人皆德之錄舊志

王樹元椿元昆弟東白村人性皆純厚事親不懈晨昏伯仲之間訢訢如也一門雍穆數十年無異言後子姓繁衍因分炊樹元椿元終日談笑怡然相對嘗謂猶樹一株我輩根本堅固任風雨飄搖不為動也人比之元芳季芳錄舊志

許高級張慶村農家子世以力田煮鹽為業父許貴昆仲三人析居後伯父許瑞子天宗病故妻王氏有遺腹子天宗遺鹽場一

榆次縣志

卷十八卓行錄清 二十一

段曉田三畝並負人舊債高級與叔許昌代償之每年代刮地煮鹽供給孤寡並出粟飲助冀天宗子成立及其叔歿高級仍時時贍給不少倦云錄舊志

劉祥雲鳴李人性耿介傭工度日年逾周甲值歲大饑困甚乃夜傍田渠穿一穴入其中以土自封人見之扶出與以饘粥且告以開賑有期劉曰年荒歲凶天令人死敢倖逃乎免終不食伺人去仍入土穴僵卧而死同時有羅建本武玉世者亦恥以乞憐苟活建本羅家莊農夫歲饑鬻產已盡謂妻子曰今生計無出其遣汝母子就食樂土何如妻曰別無他計乎曰不義之粟吾不忍食妻曰仍生離耶羅不語良久曰吾計得矣遂負杖鑿而



出數日不歸其妻尋之已自爲墓而僵其中矣戚黨憐其操咸恤其妻子玉世龍田村人歲荒饑疫已甚或勸之乞假愀然曰大荒之歲十家九空誰有餘粒能活我者况吾生平不受人憐今老矣縱富人憐而施我我豈能報之手遂仰藥自盡後數日同里楊常在者亦飲藥死之數人者其殆不食嗟來之儔歟錄舊志杜先宏字兼容西白村人生端方有義行一日途中檢一衣包歸視之乃少婦衣飾約值百餘金先宏曰此必婦人歸家所携物倘翁姑訶責婦之性命繫此矣遂持之以俟於途俄有僕夫恩遽來訴失物狀先宏審其確卽以原物與之僕感泣而去趙大普南溝村懋遷中人也精於醫尤好施與嘗制藥餌醫人有餽謝

榆次縣志

卷十八卓行錄清 二十二

者恆却之道光癸巳榆大饑斗粟千錢族人有貧不自給將離散其妻子者普竭貲保全之大理卿田公高其風爲作文表於

墓

錄舊志

常齡字錫九車輞村人少失母事繼母以孝稱以連應童試不售遂究醫家言凡遠近延者依次而往無少誤瀕行僅取炷香以去無酒食擾人時稱一炷香先生焉行醫所經或途中有疾困輒駐車以診其有家貧者雖貴重藥亦每予之五十後舉二子生平喜讀儒先書課予讀不稍姑息親鄰貧苦者多調恤又慨鴉片流毒作四戒勒石於家以垂戒清同治壬申七十四歲遠近爭來賀卽丐者亦登堂叩拜類感再生恩如一詞云光緒戊



寅卒年八十歲其弔賻之衆一如祝壽時齡精脈法不恆爲人言嘗稱靈樞素問而外傷寒金匱諸論本草綱目均須詳究然寒士爲謀生計則醫宗金鑑外汪訥菴醫書雖淺近然熟此尚不至妄投方藥也所著有治痘集要雜症萃精其羣方集要則雜採各方書加以評鶩於兒科喉證爲多云略據舊志

常恪字敬夫車輞村人幼讀書爲文皆敏捷課期值近村演劇輒携紙筆往晚繳課無誤成諸生後以父卒理家事輟學矯健果敢同治初宋景詩兵潰有游匪侵入其家與互格匪不支遁去嗣充里正鑒於向來推諉之弊於是舉凡帳簿款項等均爲總核定常法鄉約遞年約束皆有條理有犯村規者必從容面質

榆次縣志

卷十八卓行錄清 二十三

使詞窮然後分別施罰村衆皆服光緒戊寅大荒恪倡議施賑核實戶口無缺無濫其米穀多集之族人邑有事延以互商官紳皆倚重之族兄家患喉疫十日八喪人皆畏避恪獨摒擋喪葬諸事無遺憾謂兄曰死生命也設一切委之於外人事後貽悔何及以光緒己卯卒年五十五歲

石琳字廷珍北席村人自幼瞻依膝下曲盡子職尤能和睦昆弟以娛親心後遭大故喪葬之儀必誠必敬鄉里皆以孝友稱之光緒初邑遭大侵曾輸金二千四百兩以助賑閭應涂南關一里人篤於孝行事繼母甚謹年六旬時母患痢疾延醫祝禱俱不見效應涂憂之遂親視其糞嗅之以占病之吉凶如是兩月



衣不解帶母臨終數稱其賢以爲雖親生子未能如是孝敬也

錄舊志

許方斌永康鎮人性肫厚尤好施予鄰村大張義村官道地最窪下每際夏秋天雨泥淖行人病之斌不惜重貲爲之化險爲夷里人感德爰勒碑道旁以紀其事侯琬字序珍增貢生德音村人性寬厚存心利濟知無不爲村南有渠霑溉一村因鄰村侵佔琬披瀝呈懇上憲案經數年需費多金渠得賴以保全有戚貧甚營宅居之且出資爲之婚娶以延其宗祀子秉忠秉文夙秉義方制行一如其父秉文於咸豐四年赴直經紀時髮匪初過地方不靖秉忠念弟切嘗於夢中呼之遂嘔血卒秉文歸痛

榆次縣志

卷十八卓行錄清 二十四

兄以<sup>已</sup>故致疾每食必至柩前哀哭聞者慘慟未朞年亦以感傷過度卒一門厚德遠邇稱之

錄舊志

王掄爲字次猷要村鎮人性聰穎明大義雖居奇起家而推解之情迥越尋常某姓負欠千餘金不能償慨然焚券寒素親友必力爲調給使無失所至今人猶述其事王掄修亦要村鎮人負奇才幼讀書人以靈異稱之有某氏者家中落貧不能支遂作賣妻計修聞之曰某舊家子何忍視其離散輸百金以止之不數年某又作鬻子計復輸金以止之某氏遂得保全云

錄舊志

康應禧字鴻軒龍白村人幼事父以孝稱有堂嫂寡而無依應禧爲之生養死葬且立後光緒初以廩貢授訓導善讀史籍熟地



形辛卯在熱河適金丹道匪倡亂因請之領軍且爲畫策以易裝潛襲匪巢免株連鄉愚從之患遂平庚子拳亂作語人云自古左道惑人無不敗今若此患未艾也時知縣促各村演練獨龍白村無之明年春外軍攻娘子關龍泉關潰軍不免劫掠所居近什貼衆洶懼時應禧已病命子慎徽勸阻村衆且練團丁以資捍衛備食物以遣潰軍卒得安堵以清光緒二十七年卒年五十二歲

白生華字夢江鳴李村人成諸生從壽陽秦孝廉東來讀以清咸豐戊午舉於鄉遂授讀於太谷賈氏時賈氏延田京卿兩公劉侍講熙載劉大令克烈先後爲館師特深服侍講於文字外兼

榆次縣志

卷十八卓行錄清 二十五

究天文學課諸生不徒用嚴厲幾於十年後以丁親艱辭歸理家政弟早卒子幼撫之成立又充邑鳳鳴書院經理光緒丁丑戊寅連歉邑設局施賑時陳明府學富署知縣聘生華及杜孝廉道周董其事朝夕從公吏不敢欺隱時李方伯用清奉調密查各屬賑務其善否備具日記中稱榆次辦賑爲太原各屬冠善後諸策亦井井有條云己卯局事結餘款尚盈千乃與同事呈縣請建攷院詳撫得允又於鄉邑利害有所知必以興革力任之如減差徭爭邑會除私票民屯米豆依時價完納俱糾合同事人得勒石爲定制嘗與桑俱備杜道周二孝廉同庚同年同任書院經理因以進德修業四字揭匾以共勸又刊印諸善



書以貽鄉人鄉人多欽仰之以光緒壬辰卒年七十二歲  
杜道周字生甫號矩亭什貼鎮人爲諸生有文譽清咸豐戊午舉  
於鄉同治辛未大挑二等用教職任平遙永濟等縣教諭兼代  
理蒲州府教授訓士有方蒲諸生以道隆絳帳額表德教焉後  
母卒乃不復出仕所居鎮爲通衢有大橋圯壞因勸募四方得  
萬餘金親督工尅期橋成行者咸稱頌焉以光緒壬辰卒於家  
年七十二歲

常惟豫字荆河車輞村人清生員其商業有在河南者以遭捻亂  
家遽衰性狷介自守與他人交際雖一介之微終身無苟取人  
以郝子廉擬之清光緒中卒

榆次縣志

卷十八卓行錄清 二十六

桑步衡字阿臣在城人爲諸生澹於仕進充邑紳事母能孝戚友  
感紛難每得一言以爲解縣令亦遇事虛衷採納爲物望所歸  
稱鄉祭酒焉家故有肆在直隸平泉值匪亂時適居肆一日匪  
至善遣之得無損後值折閱偵知爲主計人滋弊或勸以鳴官  
步衡曰運當否息事爲上且一涉訟所損者未必償而其人各  
節生命皆有損不如姑舍之晚歲家漸落號坦然居士蕭然一  
室讀書自娛間習相宅相葬清光緒己卯創建攷院及甲申爭  
五月會事步衡與諸紳合力始終任之至癸巳卒於家年七十  
四歲

楊友桂弟友梅東陽鎮人孝子玉福之孫也兄弟友愛備至桂性



極通敏讀書頗有得因口外商業亟須整理故棄儒爲商令梅  
經管家務梅秉性慷慨酷好弓馬所交多武術中人交遊旣廣  
所費不貲桂悉數籌給初無吝色而濟困扶危矜孤恤寡昆季  
均有同情有族人楊湛病故婦戴氏以家貧子幼無以自贍問  
計於桂桂勉以守節撫孤衣食代任並允代修房屋戴氏遂得  
孀居五十年撫遺孤成立清同治初旌表已載縣志桂與梅食  
必共居必偕終其身無少變易桂梅相繼卒友桂子生蕙孫俊  
皆早亡次孫份曾孫世澤皆營商務友梅子生錦字畫堂秉性  
端方作事肫篤弱冠入泮以時當道咸際官方弗飭士習日卑  
心焉惡之遂絕意進取口外商務亦令弟生彩經營不過問惟

獨居靜室與二三良友講經論道共相勉勵嘗慨蒙師多詐僞  
虛浮誤人子弟而貧乏之家又限於貲財不屑教誨因於園中  
創設講席招集生徒不計脩脯而教法尤以謹言慎行爲要由  
是一鄉感化村人有稱先生者不問而知爲生錦也待弟生彩  
極友愛從子俊份少失怙撫之不啻己子年逾五旬妻尚無出  
戚友勸以納妾者則曰生子遲早有定數先人無失德當不至  
絕嗣卽果遇同伯道亦命也至五十五歲妻四十餘矣始生子  
倫三歲而父卒次年而母亦病廢賴生彩婦董氏撫育成人甫  
弱冠卽入邑庠云

王希聖字勉之北田鎮人幼卽嚴重自持不輕嬉笑甫冠入邑庠



以家人生齒日增祖若父復年暮遂使弟希晉專心讀書己則督理家事纖悉畢理祖與父先後卒希晉以清同治壬戌舉孝廉方正甲子舉於鄉書法尤爲時所重旋以揀發雲南知縣署順寧及雲州知州以回亂陷城謫戍希聖陽陽如平時仍督諸子姪讀書而爲弟籌備資斧饋橐無不具所居鎮在縣南東接山村民多頑獷好訟過鎮者輒曉以利害剖其曲直訟得息咸豐甲寅河東亂作奉令檄練鄉團榆次東南一鄉均倚爲重事平羣請希聖董鄉事爲立規條明約束有犯約者不徇親故悉懲之衆肅然相戒無敢犯約而義學社倉橋梁途道無不修舉其迤東數十山村相率奉約束終其身國課無一逋欠戊午歲

榆次縣志

卷十八卓行錄清 二十八

飢率鄉衆設粥廠以賑之光緒丁丑戊寅大祲亦如之鄉民之先後受惠者迭爲匾以頌其德焉陳知縣學富奉憲飭勸賑捐特延至城爲助陳說飢民之苦任卹之義感動顏色又食宿自給不糜公家邑中捐款爲通省冠事竣例得保舉慨然曰邑巨室出資而余得優舉心安乎力卻之單車旋里曾忠襄國荃時撫晉聞其事特贈書及聯以美之壬午癸未邑修志採訪者以孝友義行舉則止之曰余尚存若爾是標榜也後年漸高子孫日繁課督益嚴居恆語人云余老憊精力迥非昔比而公事不隳均同事諸公力也以光緒辛卯卒年六十二歲鄉人赴弔者絡繹不絕會葬者逾數千人途爲之塞後子茂才萼董鎮事踵



成法事仍治希聖體貌豐偉鬚眉疏古目炯炯有威重接後進必以禮田按察國俊嘗爲作傳比之漢王彥方其卒也楊學博篤復爲篆碑額以重之云

侯加圻東田村人品性端方急公好義清光緒初大侵加圻爲粥與餓者全活甚衆後施捨藥餌數十年終年八十餘歲好善樂施始終不倦里人匾其門曰品重圭璋

王太和西付村人清光緒三年歲大侵出粟十餘石賑濟之

羅國俊清歲貢生世居本邑弓村品學兼優見義勇爲家僅中貲而有求必應光緒丁丑戊寅三晉奇荒國俊出粟周濟俾親族貧乏之家無一餓死其有屍不能殮貧不能葬者必代買衣棺

榆次縣志

卷十八卓行錄清 二十九

出錢無稍吝卒年七十二歲葬之日不期而來弔者以百數云郝天佑字申之王村人幼失怙事母孝謹兄嘗觸法人皆危之天佑悉心調護及定案戍張家口復追隨千餘里風雪險阻無所避至策其安適乃歸督兄子若孫讀兄孫桂馨以清光緒己卯舉於鄉時子振鏞幼督以讀書爲人之道嘗曰讀書明理乃爲真正顯揚若竟懷安卽忝爲先人後也平居尊師重士晚尤好道諷經每凝坐靜養以爲常有村人租其地者課久缺或勸以別覓佃者曰此渠命也奪之卽奪其食與命矣因其人爲外家同宗爰召之使奉外家歲時祭掃不責所償以壬辰卒年七十六歲



桑樹甲字兆田在城三鋪人幼值母李氏多病卧榻久不起家窘甚父爲餬口計服賈他邑樹甲雖每日就塾餐必親爨侍母啖畢乃去如是者殆六七年十六歲母卒慟欲殉幸父娶繼母王氏婉言勸慰始釋懷卽以事生母者事之歷四十餘年如一日鄉里族黨咸推重無間言王生一子性冥頑學書學商俱無成父疾彌留囑以能同處則處否則析居樹甲不忍或勸之亦堅拒不從且云不孝不弟爲不仁余若背母棄弟是不仁也不仁者孟子所斥焉敢爲人以孝友稱之因貧就商雖酷暑嚴寒通夜奔馳心神交瘁不稍却由是爲鋪長所倚重樹甲尤精籌畫故所業日隆乃宅心坦白不炫己長且自奉極儉而待人以寬

榆次縣志

卷十八 卓行錄清

三十

族黨戚友有求必應恆以多金假人不償亦不介意人反以癡愚目之歿後家庭分爨弟室衣食豐裕日致小康樹甲則子孫濟濟男女幾二十口秩然和處久無異言且有職業人以爲厚德所致居室故與李明府師沆近自幼交誼甚密儼同昆季以故治家有法能媲美云以清光緒壬辰卒年五十九歲

張以信字雅蘋六堡鎮人幼從父涓讀爲諸生屢試高等食廩與人交尚氣誼無城府光緒庚子拳亂作殺教民以信潛匿教民婉詞求解於匪多得全活又奉父避難山谷資爲人所給不計也父子教授鄉里僅乃餬口父年漸高成歲貢以信不忍父勤勞獨任事蓄資每課試書院所得獎勵恆寄父卽教讀鄰村



亦聞日必歸省清光緒壬寅晉士假闈陝西鄉試時改試策論  
貧不能購書率貸之朋故癸卯再如秦鄉試畢心動遄歸則父  
病危篤未幾卒以信陽陽如平時不過甚哀戚小斂後將所貸  
書籍檢束悉還之朋故及大斂長號數聲出傍晚未歸家人徧  
索得履於井畔則以孝服自溺矣年三十九歲同學康孝廉慎  
徽馬孝廉繼楨等爲醵資以贍孤寡又屬其孤於趙孝廉鶴年  
入邑校肄業云

劉鳳池車輞村人幼讀書穎敏異常年十五學商於張家口嗣因  
旋里見有被劫致死於路者遂決計里居置田宅充省垣撫院  
稿案吏光緒初大浸因辭歸值美國文阿德教士在汾陽太谷

榆次縣志

卷十八 卓行錄清 三十一

施醫傳教遂由來浩得領洗入教任公理會宣道教習十餘年  
每佈道恆携影燈借景物與人談科學及五洲大勢間引徐中  
丞繼畬之瀛環志略作證以故讀書者多樂與談而對於婦女  
天足及男女同校二事提倡尤力又佈道時詞色不假致遭人  
忌以光緒二十六年七月初六日拳亂被戕於太谷年五十八  
歲

王文洲字春舫聶店村人生十年父卒弱冠後酷嗜古物所居接  
架琳琅又好覽儒書及佛經評騭多當所接多端人家巨富而  
自奉儉約凡故舊乞貸旣予資且代籌其生計凡待以舉火者  
定爲年額支領錢米不足亦酌遺之數十年如一日凡輸將事



率首捐巨資以資提倡村人佃種者有逋負不計償中年失偶不再娶有疾不服藥曰死生命也設誤於醫藥悔將何及古人以不服藥爲中醫吾取之清光緒丙午卒年五十一歲

王用中字極軒郭村人幼讀書將應童試值祖病泣不欲行促以往祖旋卒後成諸生父疾且卒招用中語之曰吾無他慮惟乃弟耳時弟商於省所得僅足用子女且蕃用中寬慰之父卒以教讀資生清光緒乙亥中副榜貢生戊寅大荒任事賑局有郭姓者領賑粟人謂冊注在省營生計何得濫予用中曰廚夫耳及核之信皆服其精詳公允焉庚子拳亂村衆若狂用中斥散之得無擾明年縣設局辦理教案或有誣其村有殺害教民事

且派多償款用中據理力爭事得解及病呼其子曰富人子以能守業爲佳吾士人也子不能善繼是惡兒孫非吾子也以中華民國七年卒年八十二歲

杜成章字子裁聖許村人成諸生以字行謹篤自守喜閱理學家言閒涉文選謂諸子破碎害道不甚可讀也弟成業經商省外酷嗜賭一日成章治精饌候諸門弟歸慰之曰賭事良苦得毋飢困乎盍食諸弟感愧立改行兄成文性豪放歿無餘資成章教養遺孤俾成立且授室姊適太谷武氏生女一妹適本邑畢氏生子女三女適太谷賀氏生子女各一皆以壻不善治生產業蕩盡先後並其子女教養之男皆成立女皆出嫁晚年家漸



落專資教授以謀生焉清光緒末卽家授徒兼任村事旋復設館東陽鎮與董化裁李成瀛楊倫交尤摯教子弟以小學近思錄爲必讀書無事端坐養神人或以程明道擬之書法端勁不輕作以中華民國元年卒年六十八歲

王黎照字乙峰又字乙青南關一里人幼而失恃能曲順繼母意退無懟言人皆以閔子騫目之成諸生以高等食餼後設帳授徒仲弟黎獻季弟黎彥皆繼母生昕夕教誨爲一時知名士清光緒甲午科黎照貢副榜從學者益衆塾在城東北故曹家花園境甚幽僻平居未嘗出塾門一步塾旁老圃罕識其面邑夏令慎大慕其名親訪之匿不見後以經理邑書院事官紳敦聘

榆次縣志

卷十八卓行錄清 三十三

之乃應然非公事未嘗至今室亦未嘗于以私以故官民交稱其德行焉中華民國六年卒年七十一歲

侯對廷號冠卿北田鎮人家故豐與弟覲廷事繼母疾數月侍奉湯藥無稍懈鄉人稱孝友家用有常度自奉儉約而於賑卹慈善諸事多樂助之清光緒丁丑戊寅荒浸及民國二年水災俱輸巨款以爲首倡至孤寡老疾昏喪諸乞貸者神祠橋路諸修葺者亦多助款庚子拳亂京津錢貨阻滯太谷商家有存儲多靳而不放且索償市面危懼對廷獨語其商肆使量爲放款勿遽責收商情以平居鄉率謙謹無驕倨態以中華民國六年卒年七十二歲



褚綺文字煒章在城人幼而失恃事繼母委曲承順能得歡心讀書以氣節自負通算術習騎以武生入邑庠選千總平生好俠義臨財不苟取人有急難輒傾囊相助以故人咸以善人稱之父純經商歸化蓄銀八千餘兩因商務衰落恐受累綺文慨然曰兒孫自有兒孫福請勿慮父遂決心不提己款代東償債自是家境雖遜於前怡怡如也子定邦於民國元年在縣城北關正太路旁拾得粗布一捆知爲路人遺失覓失主未得而時已初更持歸告父翌晨綺文親詣縣署呈報梁縣長際蓉爲之張布告招領旋失主赴署具狀領布將重酬之綺文拒而不受縣長曰拾物不昧具報招領洵屬古道照人難能可貴爰贈古道

榆次縣志

卷十八卓行錄清 三十四

照人匾額以彰其義中華民國十四年卒年七十五歲

董化裁字通業彭村人幼讀書與弟化時同成諸生因家貧使弟赴省求學已獨任家事堅苦儉樸人不能堪而化裁安之如素及親歿服闋仍淡食化時在省以算術爲屠京卿仁守所賞拔寒暑回家化裁亦能通其術兄弟共成四元玉鑑代數詳草形學類記等書後雖以勤儉起家然數十年不改其度化裁訓子弟必使執一業訓學者以行勤儉戒煙賭又外家王氏乏嗣歲時每親祭埽且以子用典嗣之以中華民國十六年卒年七十歲

常立教字敷五號芙隲車輞村人成諸生以優等食廩餼清光緒



乙酉舉於鄉明年會試父卒於家聞信遄返哀毀逾禮後赴京  
讀書廣交游特矜慎主司胡泰福奇其志節勉以經世學遂究  
史籍尤喜兵家言故豪飲酒酣慷慨論時事迂儒多咋舌然事  
後輒中旋歸里養母所居植花竹列文史春秋佳日奉母燕賞  
子姪之才者亦召至談藝論史且勸以爲有用學甲午東事起  
更究壬遁星象諸學皆悉其故顧性不諧俗母歿乃赴東山故  
若讀書庚子拳亂作人心危懼村衆請總團練事乃簡丁壯束  
以兵法聘教練於省垣村之缺口皆築牆闢門村衆安輯復聯  
合近村合操以壯聲勢事平仍返若辛亥革命人心洶懼復請  
總團練歸諭於衆曰今非前比也革軍至吾輩迎之土匪起吾

榆次縣志

卷十八 卓行錄清 三十五

輩擊之衆翕然受約束事旋定中華民國元年由縣委民警長  
尋謝去會制定辦理選舉代議士衆咸意向立教峻卻之特賞  
康慎徽因舉充議員二年商業壞乃如京籌度一切旣不可爲  
復歸館於王村郝氏課餘遊行郊野與村衆話家常及農事若  
無前此之率衆奮厲者識者謂此振奇人傷心特深也八年卒  
年六十四歲爲文有至性詩率臆而成近白香山楊誠齋所著  
有趣園詩草四卷趣園者以慕陶淵明取陶語以名其園者也  
馬繼琮字昺宸使趙鎮人生平沈默寡言制行不苟以清光緒辛  
卯舉於鄉宣統三年任縣自治事務所所長會革命軍興由所  
維持一切並籌墊運輸糧米等費都萬餘圓迨娘子關事解衆



慮墊款無著乃屬弟繼楨謁省大吏請以省發生息款作抵償  
交涉再四乃得允民國成立縣議會舉議長辭不就家居創建  
馬氏宗祠又馬家渠天一渠諸水利俱與策畫焉以民國十三  
年卒年六十四歲

王鍾字秀峰懷仁鎮人嘗習商於車輞村會村人劉鳳池講基督  
教聽而悅之遂棄商從教受洗於太谷公理會時教民多仗外  
勢欺凌鄉里致奉匪作難借名仇教大肆殺戮鍾獨慨然曰果  
獲罪於天安能幸免既而鳳池殉教太谷拳勢益兇鍾日坐村  
外以待死拳首率衆過村將戮之村衆環跪乞保乃獲免因自  
號罪魁嗣聯軍踞北京勒索賠款教民又借以索償鍾曰教民

榆次縣志

卷十八 卓行錄清 三十六

獲罪於人多矣若倚外勢藉端勒索上帝博愛之謂何獨以無  
損失報又對村中報賽諸攤款雖束於教規然於其他善舉每  
多認攤以爲挹注顧鍾雖奉教而於恃教欺人諸說尤爲深惡  
常執基督九福之說與西人抗辯不稍屈後遂脫離外人教會  
而以基督教徒事農商忻縣王建屏梁耀俊河曲趙模以學子  
倡中華基督教慕鍾剛直且明時務遂造訪且訂交焉鍾少時  
家故小康以喜俠義中落而臨財殊不苟取嗜菸酒後立地戒  
除絕粒至四十日而不死人恆異之以民國十六年卒年六十  
五歲

郝燧字毓林西河堡人高祖廷珮有善行調卹貧苦嘗與千叟宴



燧幼讀書性伉直人有過恆面斥而不設城府成諸生以高等食廩餼夙慕楊椒山之爲人讀其集每至流涕家貧任教讀不苟取予清光諸癸卯業師張歲貢渭卒予以信殉燧旣隨同學經紀其喪復贖金二百貸之肆以其息資贍養孤寡後肆事敗燧引爲己責旋以所得足原數別爲之營利焉中華民國元年被舉爲國民分會會員尋改任財政科長鉤稽核實爲上峰所倚重以三年病卒年四十七歲

宋啓英字雋臣大張義村人幼倜儻有膽略而尤善經營以故家事商事日有起色清宣統二年涂河下五渠各村因屢受水患建議築隄上游之馬村人情洶洶啓英獨明白曉喻當場衆議

榆次縣志

卷十八卓行錄清 三十七

解隄遂成永康各村爲勒碑紀實焉民國六年夏涂河水溢毀堰王郝村衆因挾隄致災下五渠民衆恨甚將肆毒王郝村民以圖報復官不能制啓英出任調解亦以賠償損失了結不致釀命案餘如以棉花運銷外洋及與外人合辦煤油莊等事均能當機立斷尤爲人所不可及嗣充縣商會會長以民國二十一年四月卒年五十三歲

秦吉友東陽鎮人父某宦於奉天卒扶柩歸妹適某亦宦於奉天者吉友家旣貧不能給遂設蒙館尋厭其煩賂謝去遂與丐者伍然不作卑乞語長衣不脫家中儀仗等不賣曰吾雖淪下流吾家非下流也恆佯狂歌呼於鄰村戲會場乞有餘分給羣兒



以故羣兒多樂就之爲之裝旱菸服諸小役且呼以先生焉清  
光緒中其妹專差齋書及銀迎赴安東吉友收銀覆書謝之人  
詢故曰吾妹爲宦婦吾以漫浪慣豈受拘束設貽妹羞則不若  
不往也出銀分給諸貧苦餘則購佳糕點呼村兒共食之盡大  
笑去終身不爲邪污行邈邈以死